

1 Pedro

¹ Høøch xøhajp Pedro. Jesucrístøch xquiuguexyhajp. Mijts hädaa nocy nyajnäjaayøøby pønhatiä Diosmädia'agy mäbøjp. Xii yaa hajxy wiingtuumjaty mhadsäna'ay jim maa naax jaduhñ xiøhatiän Ponto, møød jim Galacia, møød jim Capadocia, møød jim Asia, møød jim Bitinia.

² Jeqüän mijtsä Diosteedy xwyiimbiiyy. Tøø Dios hänajty ñajuø'oy coo mijtsä miädia'agy hänajty mmäbøgaanä. Ja'a yhEspirituhaamä Dios hajxy tøø xyaghodiägø'oy, weenä mädia'agy hajxy jaduhñ mmäbøgät ja'a Jesucristocøxpä. Jaaya'ay hajxy tøø xyajnhwáatsäm mänaa hajxy xñähho'túutäm. Weenä Dios ja'a hoyhajtä weenhajt hajxy xmio'oy mõj may.

³ Tsøgä Dios hajxy wiingudsähgøøyyäm. Jaaya'ayä Jesucristo Tieedyhajpy. Højtsä Jesucristo nWiindsønähajtäm. Hojiootä Dios jiaanç tehñ miøød ja'a højtscøxphajtäm, paady hajxy homiänaajä xyagjugyhadäänäm neby je'e jiugyhatiän. Coø Dios ja'a Jesucristo yagjuypiøjtägajch coo hänajty tøø yho'ogy, jaduhñä tøyhajt hajxy nmøødhajtäm coø Dios hajxy jaduhñ xjiaanç yagjugyhadäänäm homiänaajä ⁴ jim tsajpootyp. Jimä hoyhajtä weenhajt hajxy mõj may xmio'owäänäm, neby jaduhñ jecy miänaañän cooc hajxy hänajty xmio'owäänäm. Tijaty hajxy yaa nyagjugyhajtäm hädaa yaabä naaxwiin, tsipcøxp jaduhñ quiøxa'añ, tsipcøxp jaduhñ quiuhdägoyya'añ. Pero mädyijatiä

Dios hajxy jim̄ xmio'owáanäm tsajpootyp, cab jaduhñ mänaa quiøxa'añ, cab jaduhñ mänaa mia'ada'añ, cab jaduhñ mänaa quiuhdägoyya'añ. Homiänaajä yajxón̄ yhida'añ. ⁵ Coö mijtsä Dios miädia'agy jaduhñ mmäbøjcä, paadiä Dios hajxy xcwieendähada'añ ja'a miøcmäjaahaam. Cab hajxy jaduhñ mänaa mguhdägoyya'añ. Coö ja'a Dios yHuung yaa quiädaactägatsa'añ hädaa yaabä naaxwiin, ja'a Jesucristohajpä, mänit hajxy jim̄ xyajñøcxáanäm tsajpootyp Dioswiinduum. Jimä Dios hajxy homiänaajä xyagjugyhadáanäm neby je'e jiugyhatiän.

⁶ Paady mijts jootcuje mhity, hoy hajxy jäda'ahaty madiu'u mja tsaačhpøcy. Pero cab hajxy jejcy mdsaačhpøga'añ. ⁷ Høxtahmdsä oro, jøønhaamä jäya'ayä oro hajxy yhijxmach pø hoyhoro jaduhñ. Jaanä jaduhñ mijtsä Dios xyhijxmajtspä pø hamuumdu'jootä miädia'agy hajxy mmäbøjcä, hoy hajxy mja jaanč tehñ chaačhpøcy. Jaanč tehñ choobaatp jaduhñ coö hajxy jaduhñ mmäbøgät tehñgajnä. Cabä oro jaduhñ jiaty tsoobaady neby jaduhñ choobaadiän nej mijts homiänaajä mmäbøquiän. Hix, tsipcøxpä oro jaduhñ quiuhdägoyya'añ. Y coö Jesucristo yaa quiädaactägatsa'añ, mänit mijts xquiumaya'añ je'eguiøxpä coö hajxy hänajty tøø mmäbøcy, hoy hajxy hänajty tøø mja jaanč tehñ chaačhpøcy.

⁸⁻⁹ Hoyyä Jesucristo hajxy tøø mga'a jagä hixy, mdsojpy mba'häyooby hajxy jaduhñ, y mmäbøjcäbä miädia'agy hajxy jaduhñ. Hoy hajxy tøø mga'a jagä hixy, coö hajxy jaduhñ mmäbøcy, paady hajxy jaduhñ tøø xyajñähwa'ačh. Coö hajxy

jaduhñ tøø xyajñähwa'ačh, paady hajxy jaduhñ mjaančh tehñ xiooñda'agy nägø'ø nädecypiä.

10 Ja'a jäya'ayä Diosmädia'agy hajxy jecy yajwá'xäbä, jia wi'i yajtøøby jia wi'i yajtø'xyp hajxy hänajty neby hajxy piäda'agøøjät hawa'adstuum. Cab hajxy hänajty ñajuø'øy neby hajxy jaduhñ jim piäda'agøøjät. Pero ñägäpax hajxy jaduhñ coo mijtsä Dios hänajty xpiäda'aga'añ hawa'adstuum, je'eguiøxpä coo hojiot miøødä. 11 Yajtøøby hajxy hänajty pøn mijts hänajty min xpiäda'aga'añ hawa'adstuum. Jaduhñ hajxy hänajty yajtøøbä mänaa hänajty myina'añ. Ja'a Dios jaduhñ hawaanä ja'a yhEspírituhaam cooc tu'jäya'ay hänajty yaa min chaačhpøga'añ. Y cooc hänajty tøø yho'nä, mänítäc hänajty jiuypjøjtägatsa'añ. Mänítäc hänajty jim ñøcxtägatsa'añ tsajpootyp maa Dioswiinduumän. Pero ja'a jecyjäya'ayhajxy, cab hajxy hänajty jaduhñ ñajuø'øy pønä Dios hänajty tøø ñänømy ja'a yhEspírituhaam. Ñä'ä cujahy hajxy jaduhñ nebiaty hajxy jaduhñ ñajtscapxøøyyä. 12 Mänit hajxy jecy yhawáanäxä coogä Dios jaaya'ay hänajty quia'a tsoj quexa'añ, ja'a mijts hänajty xpiäda'agaambä hawa'adstuum. Cujéquiägä Dios hänajty quiexa'añ. Hoorä, tøø quiejxnä. Jaduhñ tøø yajtøjiajnä coo ja'a yajñähwaatspä tøø quiejxnä. Y tøø mijts jaduhñ mjaančh mädoymaty coo ja'a yajñähwaatspä yaa tøø yhoy. Ja'a Jesucristøch jaduhñ nnänøømby coo hajxy hoy xñähho'túutäm. Y jaaya'ay mijts xyajmädoymhájtäbä, ja'a Dios ja'a yhEspírituhaam hajxy jaduhñ ñajtscapxøøyyä nebiatiä Diosmädia'agy hajxy yajwá'xät.

Tsajpootypä Dios ja'a yhEspíritu yajtsohndaacy coo jaduhñ yaa quiejxy hädaa yaabä naaxwiin. Haa ja'a Dios ja'a mioonsähajxiä, ja'a hajxy jaduhñ jim hijpä tsajpootypä, jiaančh tehñ yagjuøøby hajxy jaduhñ coo Dios ja'a yHuung jaduhñ yaa quiejxy hädaa yaabä naaxwiin, coo hõjts hoy xñähho'túutam.

¹³ Y coo Jesucristo jaduhñ yaa jadähooc quiädaactägatsa'añ, mänit hajxy jaduhñ jim xyajnøcxáañäm tsajpootyp maa Dioswiinduumän, pønjetiä Diosmädia'agy hänajty tøø miäbøcy. Mänitä hoyhajtä weenhajtä hajxy jim ca'xy xmio'owáañäm. Coo Dios jaduhñ tøø miäna'añ coogä yHuung yaa quiädaactägatsa'añ, jaduhñä tøyhajt hajxy nmøødhájtäm coo jaduhñ tiõjiada'añ. Tsøcxä njoot hajxy pädáacäm maa hoyhajtän, maa weenhajtän, mädyii Dios hajxy hänajty xmio'owáañäm. Tsøcxä hajxy hoy wädíjtäm. Tsøc hajxy jahmiejtstáacäm coo Jesucristo yaa quiädaactägatsa'añ. ¹⁴ Coo Dios hajxy xyhuunghájtäm, paadiä miädia'agy hajxy tsøc mäbøjcäm. Cabä haxøøgwiinmahñdy hajxy jadähooc mbadu'ubøjcumbät, neby hajxy hijty mjatcø'øyän coo Dioscapxiä Diosmädia'agy hajxy hijty mga'a mädoyhatyñä. ¹⁵ Ca'a haxøøgjoot ca'a haxøøgwiinmahñdy hajxy myaghity. Hix, cabä Dios haxøøgjoot haxøøgwiinmahñdy ñä'ägädä møødä. Jaaya'ay hajxy jaduhñ xyajñhdíjjäm coo hajxy xquiu'ughadáañäm. Paadiä hojiot hajxy tsøc yaghíjtäm nebiä Dios hojiot miøødän. ¹⁶ Jaduhñ jim myiñ cujaay maa Diosmädia'aguiän: “Høøch, cábøchä haxøøgjoot cábøchä haxøøgwiinmahñdy nnä'ägädä møødä. Høøch hajxy pahijx padúunäc”,

nømä Dios jecy miänaañ.

17 Ja'a Dios hajxy nwiingudsähgøøyyäm. NDeedyhajtäm hajxy jaduñ. Paady hajxy hoy tsøc jäya'ayhajtäm mäduhñtiä hajxy yaa ndsänaayy nhäyóowäm hädaa yaabä naaxwiin. Hix, nnajuøøyyäm hajxy jaduñ coo Dios hajxy xyajcumädowääñäm nebiaty hajxy hñajty yaa haxøøg tøø njatcøøyyäm hädaa yaabä naaxwiin, hoy hajxy hñajty näje'e tøø nja mäyøødsänäayyäm. 18-19 Ja'a nhaphajtäm ja'a ndeedyhajtämhajxy ja'a jegyhajtypä, coo yhamdsoo cuhdujt hajxy hijty hoy quiudiuñ, jadúhñäc tyijy hajxy ñähwa'adsa'añ. Y jaduñ mijts tøø mbahabøjpä. Pero cab jaduñmbä cuhdujt choobaady. Coo Jesucristo hajxy hoy xñähho'túutäm, ja'a ñø'tyhaam hajxy xpiädáacäm hawa'adstuum. Ni tii hajxy jaduñ xquia'a pädáacäm hawa'adstuum, ni xädøøñ. Hix, paquiä xädøøñ quiøxy. Jagooyyä Jesucristo hajxy xpiädáacäm hawa'adstuum ja'a ñø'tyhaam. Hix, cabä Jesucristo ni tii poj ni tii cädieey quia'a møødä. Paady hajxy je'e hoy xpiädáacäm hawa'adstuum. Coo Jesucristo ja'a poj ja'a cädieey häxøpy miøødhaty, cab hajxy häxøpy tøø xpiädáacäm hawa'adstuum. 20 Jéquiänä Dios ja'a yHuung jaduñ yajnähdiyy cooc hñajty yaa quiexa'añ hädaa yaabä naaxwiin, cáhnäc hädaa naaxwiimbä hñajty yhawijy tiøø'xta'agy. Pero cabä Dios ja'a yHuung choj quejxy. Cujecy jaduñ quiejxy mänaabä højts hñajty yaa njugyhajtämbä. Højts hoy xñähho'túutäm. 21 Coo Jesucristo hñajty tøø yho'ogy, mänitä Dios yagjuypiøjtägajch. Mänit jim jadähooc yajnøcxy maa wyiinduumän.

Jim jäda'ahaty wyiingudsähgø'øyii. Y coo Dios ja'a yHuung jaduñ yagjyppiøjtägajch, paadiä miädia'agy hajxy tsøc mäsøjcäm coog hajxy xyagjygyhadäänämbä homiänaajä neby je'e jiugyhatiän.

²² Tøyyä Dios miädia'agy. Y coo mijtsä miädia'agy hoy mgudiuunä, paadiä mjootä mjuøhñdyhajxy nähwa'ads yhity. Naxy hajxy jaduñ mdehm ñichoc mdehm ñimiee'xøøjät hamuumdu'joot. Jaduñ hajxy mnijiäwø'øwøøjät nebiä tu'que'expän nebiä tu'mägu'ugpän.

²³ Tøø haxøøgjoot tøø haxøøgwiinmahñdy hajxy nnajtshixøøyyäm. Homiänaajä Dios hajxy xyagjygyhadäänäm neby je'e jiugyhatiän. Jaduñä hojiootä howyiinmahñdy hajxy xmiøoyyäm hawiinjemy, je'eguiøxpä coo miädia'agy hajxy nmäsøjcäm. Cabä miädia'agy mänaa quiuhdägoyya'añ. Jaaya'ay hajxy jaduñ xyagjygyhadäänäm homiänaajä neby je'e jiugyhatiän, ca'a piønä hädaa yaabä naaxwiimbä, ni ja'a ndajhajtäm ni ja'a ndeedyhajtäm. Haa ja'a hädaa yaabä naaxwiimbä jugyhajtä, tsipcøxp jaduñ quiøxa'añ. ²⁴ Jaduñ jim myiñ cujaay maa Diosmädia'aguiän:

Høxtahmdsä pøjy, hoy jaduñ jia yajxonä, tsipcøxp je'e ñä'ägä tø'øch.

Jaduñ mäwiin højtshajtäm, hoy hajxy møj jaanch nja niijiäwøøyyäm, tsipcøxp hajxy nnä'ägä ho'og nnä'ägä tögoyyäänäm.

²⁵ Pero ja'a Diosmädia'agy, cab jaduñ mänaa quiøxy tiägoy.

Ja'a Diosmädia'agy jaduñ mänaamb coogä Jesucristo hajxy hoy xñähho'túutäm. Tøø mijsä jäya'ay jaduñ xyajmädoxyhaty, ja'a Diosmädia'agy hajxy jecy yajwá'xäbä.

2

¹ Coo Dios hajxy homiänaajä xyagjugyhadäänäm neby je'e jiugyhatiän, jaduñä hojiootä howyi-inmahñdy hajxy tøø xmióoyäm hawiinjemy. Paadiä haxøøgjootä haxøøgwiinmahñdy hajxy tsøc najtshixøoyäm cøxiä. Cab hajxy mnä'ägä høhñdá'agät ni weeñtiä. Hamuumdu'joot hajxy jaduñ tøy mjaanç hojiäya'ayhädät. Jii jäya'ayhajxy näje'e, cabä Diosmädia'agy hajxy hoy quiudiuñ, hoy hajxy jia nidijyii nebiä hojiäya'ayän. Ca'a hajxy jaduñ mbahixy. Ca'a hajxy pøn cøxiä wiinä myajcuxøøghadø'ø. Cab hajxy mniñähøøn mniñähojøøjät. ²⁻³ Tøyhajt jaduñ coo Jesucristo mayhajt mõj may tøø tiuñ maa mijsøxpän. Mnajuøøby hajxy jaduñ, túhmäts. Hahixøøbyxiä jaduñ coo miädia'agy hajxy tehngajnä mbanøcxät. Høxtahmäsä maaxhuunghajxy, coo hajxy hänajty chi'idsa'añ, mänitä tsi'tsc hajxy ñäjø'ø. Jaduñ mäwiin mijspä, mba'yá'axäp ja'a Dios hajxy coo quiapxiä miädia'agy hajxy ween tehngajnä xjiaac yaghabøcy. Jaduñ hajxy ca'xy pedyii hoy myajtúnät. Y cab hajxy jaduñ mänaa mdu'udägóyyät.

⁴ Tehngajnä Jesucristo wyiinmahñdy hajxy jaac tehñ piähixä jaac tehñ piaduunä. Ja'a Dios jaduñ jecy wiinmaayy coo højts hänajty jaduñ xyhuunghadäänäm ja'a Jesucristocøxpä. Ja'a

Jesucristo, ja'a Dios yHuung je'e, paadiä cuhdujt jaduñ miøødä coo hajxy nwiingudsähgøøyyämät. Pero cabä jäya'ayä Jesucristo hajxy näje'e jiøjpøgø'øy. Cab hajxy wyiingudsähgø'øy. Xiøøghajpy hajxy jaduñ. ⁵⁻⁶ Jaduñ jim myiimbä cujaay maa Diosmädia'aguiän:

Jim maa cajpt jaduñ xiøhatiän Siön, jimhöchä ndsajtøjc tu'ug ngojy.

Tú'ughöchä tsaa nwiimbiiyy coo jim piäda'agøøjat maa tøjteecän.

Jaanč tehñ tiuungpaatp yø'ø tsaa jaduñ.

Ja'a Dios ja'a Jesucristo jaduñ yajmäbaat nebiä tsaa ja'a jaanč tehñ tiuungpaatpän, coo jaduñ yaa quiejxy hädaa yaabä naaxwiin, coo hajxy hoy xyajnähwáatsäm. Jaduñä Dios miänáaŋgumbä cooc tsipcøxp yajtøjiada'añ coo hajxy jim yajnøcxa'añii tsajpootyp maa Dioswiinduumän, pønjaty jaduñ mäbøjp coo Jesucristo hajxy xyajnähwáatsäm, ca'a wyiinghäna'cä. Coo Jesucristo hajxy tøø xjiaanč yajnähwáatsäm, jaduñä Dios hajxy tøø xyajnähdíjjäm coo Jesucristo hajxy nmøødhíjtämät tu'ugmädia'agy. Tehngajnä Diosmädia'agy hajxy tsøc hoy jaac tehñ quiudiúunäm. Tsøgä Dios hajxy hoy jaac tehñ wyiingudsähgøøyyäm. Jaduñä Dios hajxy xquiumáayyämät.

⁷ Coo mijts jaduñ mmäbøcy coo Jesucristo hajxy hoy xyajnähwáatsäm, paadiä Jesucristo hajxy mdsocy, paady hajxy mwiingudsähgø'øy. Hoorä, jaduñ jim myiingumbä cujaay maa Diosmädia'aguiän:

Jii tsaa tu'ug, cabä tøjmuu'tspädøjc-hajxy hijty hoy yhixy;

cab hajxy hijty yajtuna'añ.

Pero ja'a cudøjc, yajxón yø'ø tsaá yhixy, paady jim yajpädaacä maa tøjteecän.

⁸Jaduhñ wiingtuum myíngumbä:

Jii tsaá tu'ug, coo pøn quiuhnepy, cädaab hajxy jaduhñ.

Ja'a Jesucristo jaduhñ yajmäbaatä neby yø'ø tsaajän.

⁹Højtsä Dios tøø xyajnähdíjjäm coo miädia'agy hajxy nmäbøjcämät, coo hajxy xquiu'ughájtämät. Xyhuunghájtäm hajxy jaduhñ coo hajxy ween hoy njäya'ayhájtämät neby je'e hoy jiäya'ayhatiän. Tøø cuhdujt hajxy xmióoyyäm coo hajxy nDeedyhájtämät nebiä Jesucristo ja'a Dios Tieedyhatiän. Tøø Dios hajxy xyajpädsøømäm haxøøgtuum. Hodium hajxy hoy xpiädaactägájtäm. Jaduhñä miädia'agy hajxy nyajwá'xämät coo møjmayhajt tøø tiuñ maa højtsøxphájtäm. ¹⁰Coo mijts hijty mga'a mäbøcy, paadiä Dios hajxy hijty xquia'a cu'ughaty. Cabä Dios hajxy hijty xñäxuuč. Pero coo hajxy jaduhñ mmäbøjnä, paadiä Dios hajxy jaduhñ xñäxuu'tsnä. Paady hajxy xquiu'ughajnä.

¹¹Mägu'ughajpädøjc, hoy hajxy yaa nja hjtäm hädaa yaabä naaxwiin, cabä njoot hajxy yaa tøø nbädácäm maa hädaa yaabä naaxwiimbän. Jimä njoot hajxy tøø nbädácäm maa Dioswiindumän. Tsøcxä haxøøgwiinmahñdy hajxy høxhíjxäm, jaduhñä Dios miädia'agy hajxy hoy ngudiúunämät.

¹²Hoy hajxy mja hity maa jäya'ayä Diosmädia'agy hajxy quia'a mäbøquiän, hoy hajxy mwädítät. Hoy hajxy jaduhñ mjäya'ayhädät, hoyyä jäya'ay hajxy

cu xjia nähøønø'øw. Coo Dios yaa quiädá'agät tøyhajtyajjepä, mänit mijtsä jäya'ay hänajty xy-hixa'añ coo mijtsä Dios miädia'agy hänajty hoy tøø mjaančh cudiuunä, ja'a Diosmädia'agy hajxy hänajty tøø quia'a mäßøquiaäbä. Mänitä Dios hajxy wyiingudsähgøøwa'añ.

¹³ Mwiingudsähgøøyyäbä tuuŋgmøødpä miädia'agy hajxy. Cabä pøn jaduhŋ waamb xñänømät. Hix, mbanøcxypä Diosmädia'agy hajxy jaduhŋ. Y coo ja'a tuuŋgmøødpä miädia'agy hajxy mga'a wiingudsähgøøyyät, mäna'anaambä jäya'ayhajxy jaduhŋ coogä mädia'agy quia'a hoyyä, ja'a mijts jaduhŋ mbanøcxypä. Mwiingudsähgøøyyäbä gobiernä miädia'agy hajxypä. Jaaya'ay møjtuuŋg jaduhŋ nä'ägä møød.

¹⁴ Mwiingudsähgøøyyäbä gobiernä mioonsä miädia'agy hajxypä, ja'a hajxy jaduhŋ møjtuuŋgmøødpä. Pønjaty jaduhŋ cädiehby, je'e hajxy jaduhŋ yajcumädooby. Pønjaty hoy jäya'ayhajp, je'e hajxy jaduhŋ quiumaaby. ¹⁵ Jaduhŋä Dios chocy coo hajxy hoy mjäya'ayhädät. Jii jäya'ayhajxy näje'e, cabä Diosmädia'agy hajxy nä'ägädä wiinjuø'øwa'añ. Jaančh tehŋ quiuhxex hajxy jaduhŋ. Hoy hajxy jaduhŋ quia'a jagä wiinjuø'øwa'añ, nøm hajxy wyi'i miäna'añ cooc tyijy ja'a Diosmädia'agy quia'a hoyyä. Hoorä, coo mijts tøyhajt mhojiäya'ayhädät, caj mijtsä jäya'ay hoy xñähøønø'øwät, ja'a Diosmädia'agy hajxy ca'a wiinjuø'øwaambä.

¹⁶ Näje'ejä jäya'ayhajxy miäna'añ cooc tyijy cuhdujt hajxy miøødä coo hajxy hoñejpiä jiatcø'øwät, je'eguiøxpä coogä Jesucristo hajxy tøø yajnähwa'ačhii. Pero cab jaduhŋ tiøyyä. Cab

jaduhñ yhooyä coo hoñejpiä njatcøoyämät. Pero tsögä Dios miädia'agy hajxy cudiúunäm nebiaty hajxy xyhanéhmäm. ¹⁷ Mwiingudsähgø'øwäbä jäya'ay hajxy nägøxiä. Mniçhoc mnimiee'xøøjäp hajxy pønjatiä Diosmädia'agy mäbøjp. Mwiingudsähgø'øwäbä Dios hajxy, jaduhñä gobiernä hajxy mwiingudsähgøøbiät.

¹⁸ Mijtshajxy moonsähajpä, mmäbøjcäbä mwiindsønä miädia'agy hajxy. Mwiingudsähgø'øwäp hajxy jaduhñ, hoy hñajty yhojiäya'ayä quia'a hojiäya'ayä. ¹⁹ Coo mwiindsøn hajxy xchaaçhtiúnät nä'ä nägoobä, hoy hajxy hñajty tøø mga'a jagä cädieey, mmee'xtúgäp hajxy jaduhñ. Mnajuøøby hajxy jaduhñ coo Dios hajxy jaduhñ xquiumáyät. ²⁰ Pero pø tøø hajxy hñajty mjaançh cädieey, hahixøøby jaduhñ coo hajxy mgumädówät. Y cabä Dios hajxy jaduhñ xquiumáyät, hoy hajxy cu mja mee'xtuc. Pero pø cab hajxy hñajty tøø mgädieey, coo mwiindsøn hajxy nä'ä nägoobä xyajcumädówät, y coo jaduhñ mmee'xtúgät, mänitä Dios hajxy jaduhñ xquiumáyät. ²¹ Jaduhñä Dios hajxy tøø xyajnähdíjäm coo häna'c hajxy nä'ä nägoobä xchaaçhtiúunämät nebiä Jesucristo chaaçhtiúunän. Hix, højts jaaya'ay xñähho'túutam. Y miee'xtujc jaduhñ. Jaduhñä Dios chocy coo Jesucristo hajxy nbahíxämät neby je'e miee'xtujquiän. ²² Cabä Jesucristo mänaa ñä'ägä cädieey. Ni mänaa quia'a hønnda'agy. ²³ Coo haxøøg jia nämaayyä, cab haxøøg yhadsoodägajch. Coo chaaçhtiúunä, cab jaduhñ waamb miänaañ coo hñajty yaghawiimbijtägatsa'añ. Ja'a Dios

quiø'øjooty je'e ñibiädaacä. Hix, ñajuøøbiä Jesucristo hänajty jaduñ coo jäya'ayhajxy hänajty nägøxiä yajtøyhajtyega'añii ja'a Diósäm. Jaduhnä Dios hajxy xyhíxäm neby hajxy njäya'ayhájäm. ²⁴ Coø Jesucristo hajxy hoy xñähho'túutäm cruzcøxp, jaduñnä nbojpä ngädieey hajxy xyajñähwáatsäm. Tsøcxä ja'a haxøøgwiinmahñdy hajxy najtshixóøyyäm. Tsøc hajxy jahmiejtstáacäm coø Jesucristo hajxy nmøødhítäm tu'ugmädia'agy mänaa yho'oguiän, mänaa jiuypiojtägachän. Paady hajxy njugyhadaänäm homiänaajä nebiä Dios jiu gyhatiän. Coø hajxy jaduñ ngudiúunämät nebiä Dios hajxy xyhanéhmäm, mänitä Dios hajxy jaduñ xquiumayáanäm. ²⁵ Jaduhñ mäwiin hajxy hijty njäya'ayhájäm nebiä meeghajxy tiägowiäditiän jäguemduum. Cabä mädia'agy hajxy hijty nmäbøjcäm ja'a Jesucristocøxpä. Pero tøø hajxy nmäbøjcänä. Y xcwieendähájämä Jesucristo hajxy jaduñ.

3

¹⁻² Mijts to'oxiojtøjc, mwiingudsähgø'øwäbä mnihyhap hajxy. Coø mnihyhapä miädia'agy hajxy hoy mgudiúunät, y coø Jesucristo hajxy mwiingudsähgø'øwät, wehñdä mnihyhapä Diosmädia'agy hajxy miäbøgät, pø cahnä hajxy hänajty miäbøcyñä, hoy hajxy hänajty waamb mga'a jagä näma'ay coø hajxy ween miäbøcy. ³⁻⁴ Je'e ja'a Dios jaduñ quiumaaby coø hojioot hajxy mmøødhádät, coø mnihyhap hajxy mee'xxieemy mmägápxät. Je'eds jaduñ tsoobaatp coø Diosmädia'agy hajxy jaduñ mgudiúnät hamuumdu'joot. Y cab hajxy jaduñ

mänaa mdu'udägóyyät. Cab hajxy myajcumáyät pø jii howyit hodiucxy hajxy hänajty mmøødä, pø jii oronaamdsøm, pø jii orotaatstøy hajxy hänajty mmøødä, pø hoyyä mguhwaay hajxy howyit hoguiuhxotshaam hänajty mgu'udy. Cabä Dios yø'øduhmbä jiaty möjpäda'agy, ni jaduñ quia'a jega'añ. ⁵ Ja'a to'oxiøjcä Diosmädia'agy hajxy hijty jegyhajty panøcxpä, wyiingudsähgøøbiä ñihyhap hajxy hijty. Mee'xxieemy hajxy hijty. Miäbøjpiä Diosmädia'agy hajxy hijty coo hajxy hänajty cwieendähada'añii ja'a Diósäm. ⁶ Jaduhñä Sara ja'a ñihyhap jecy wyiingudsähgøøyy, ja'a Abrahamhajpä. Mee'xxieemy hänajty miägapxy. Quiumaayy ja'a Dios ja'a Sara jaduñ. Y mijts to'oxiøjtøjc, jaduñ mijtsä Dios xquiumáabiät coo mijtsä Sara wyiinmahñdy mbahijx mbadúunät. Hoy hajxy mwädítät ja'a Dioscøxpä. Y cabä mhaa mjoot hajxy myagjádät cooc tyijy ja'a mñihyhap hajxy hänajty mmägapxtägoy.

⁷ Jaanä jaduñ mijts nmägapx nhanehmbä, mijts ya'adiøjtøjc. Mdsoc mmée'xäbä mdo'oxiøjc hajxy. Mmøødhádäbä hojiot hajxy jaduñ. Hiñ, cabä to'oxiøjcä miäjaahajxy miäbaady nebiä ya'adiøjc-hajxy miøcän. Paady hajxy mgüeendähádät. Hiñ, xmiooby mijtsä Dios ja'a hoyhajtä weenhajt näguipxy møødä mdo'oxiøjc. Hiñ, näguipxiä Dios hajxy xyajñähwa'açh møødä mdo'oxiøjc-hajxy. Tiuumbiä Dios mayhajt jaduñ. Pero coo mdo'oxiøjc hajxy mga'a tsoc mga'a méé'xät, xiøøbä Dios hajxy jaduñ mnä'ä pa'yáaxnät.

⁸ Mägu'ughajpädøjc, jaduñ hajxy homiänaajä

mnä'ägä ničhoc mnä'ägä nimiee'xóøjät
 nebiä tu'ugmägu'ug nebiä tu'ugpuhya'ayän.
 Mniñäxuudsóøjöp hajxy jaduhñ hamiñ
 haxøpy. Mee'xxieemy hajxy mnimiøødcapx
 mnimiøødmädia'agóøjät. Jaduhñ hajxy
 mhídät tu'ugmädia'agy nägøxiä. Jaduhñ
 hajxy hoy mdsänä'awät nägøxiä. ⁹ Co
 mijts pøn cøxypänejpiä xtiúnät, cab hajxy
 myaghawiimbijtagátsät. Y coo hajxy pøn
 xwyiinwóonät, cab hajxy mhadsoowiimbídät.
 Mmānuu'xtá'agäbä Dios hajxy jaduhñ coo ween
 piuhbedyii ja'a tøø xwyiinwóoñäbä. Jaduhñ
 mijtsä Dios tøø xyajnáhdijy coo Dios ja'a hoyhajtä
 weenhajt hajxy xmió'owät.

¹⁰ Pø mdsojpiä mhoyhäyow ja'a mhočhána'a hajxy,
 cab hajxy mänaa mhøhñdá'agät.

Cab hajxy mänaa mgapxtägóyyät.

¹¹ Mnajtshixó'øwäbä mhaxøøgwiinmahñdy hajxy.

Hoy hajxy mjäya'ayhádät. Cab hajxy mnimiädsip
 mnimiäma'adóøjät ni mänaa.

¹² Hix, cwieendähajpiä Dios pønjetiä miädia'agy
 mábøjcáp.

Y coo Dios hajxy miānuu'xta'agy, mänit hajxy pi-
 uhbedyii.

Pero ja'a häna'c-hajxy haxøøg wädijpä, cab hajxy
 ñäxuuchii ja'a Diósäm,
 nømä Diosmädia'agy miāna'añ.

¹³ Hoorä, coo hajxy hamuumdu'joot
 mhojiäya'ayhádät, cab hajxy jaduhñ pøn
 cøxypänejpiä xtiúnät. ¹⁴ Jii jäya'ayhajxy näje'e,
 mijts xjia wi'i chaačhtiunaamb, hoy mijts mja
 hojiäya'ayhaty. Pero ca'a hajxy mdsähgø'øy;

ca'a hajxy tii mdajy mmay. Ja'a Dios hajxy jaduhñ xcwieendähadaamb. ¹⁵ Hamuumdu'jootä Jesucristo hajxy mwiingudsähg'owät. Hiñ, jaaya'ay hajxy nWiindsønähjtäm. Y coo hajxy pøn xmiäyajt'owät tiiguiøxpä Diosmädia'agy hajxy hänajty coo mmäbøcy, cab hajxy mdsähg'owät; mnägápxäp hajxy jaduhñ tiiguiøxpä hajxy coo mmäbøcy. Mee'xxieemy hajxy jaduhñ mhadsowät, ca'a yhajootma'adä. ¹⁶ Nägüeentä hajxy tehngajnä mwädítät, coo hajxy jaduhñ mnä'a cädieeyät. Jaduhñä tøyhajt hajxy mmøødhädät coo hajxy hänajty hoy mwädity. Hoy hajxy mwädítät, hoyyä jäya'ay hajxy xjia nähoyj xjia näya'axy coo Jesucristo miädia'agy hajxy hoy myajtuunä. Coo hajxy jaduhñ hoy mjaançh wädítät, mänitä häna'c-hajxy jaduhñ chähdiuna'añ coo mijts hänajty jaduhñ tøø xñänømy.

¹⁷ Hoy jaduhñ coo hajxy hoy mwädítät, hoy hajxy hänajty mja tsaächpøcy. Hiñ, ja'a Dios hajxy hänajty tøø xyajnähdijy coo hajxy tähoocjaty mdsaaçhpøgät, hoy hajxy hänajty mja howiädity. Pero coo hajxy hänajty haxøøg mjatcø'oy, cab jaduhñ yhooyä; mgumädowäp hajxy jaduhñ. ¹⁸ Hoyyä Jesucristo mänaa quia'a jagä cädieey, tsaächpøjc je'ebä. Coo hajxy hoy xñähho'túutäm, jaduhñä nbojpä ngädieey hajxy xyajnähwäatsäm. Y jaduhñ hajxy jim xyajnøcxáañäm Dioswiinduum. Tähoouqiä hajxy xñähho'túutäm. Ja'a ñi'xä quiopc-hajtiä jaduhñ ho'c. Pero ja'a jiootä yhEspíritu, cab jaduhñ ñä'a ho'cy; jujyñä hänajty jaduhñ yhity. ¹⁹ Ja'a jiäwøhñdyhaamä Jesucristo yhooyy maa ho'ogyjiäya'ayhajxy hänajty tsumy

yhitiän. Jimä hawiinjemybiä mädia'agy hajxy hoy yajwiingapxø'øyii coogä Dios ja'a Jesucristo hänajty tøø quiexy mäyajnähwaatspä. ²⁰ Paady hajxy hänajty tsumy yhity je'eguiøxpä coo Diosmädia'agy hajxy jecy quia'a mæbøjcy mänaa Dios jia nägapxiän coo nøøgomdägoy hänajty tiägø'øwa'añ, mänaa Noé ja'a biarco hänajty yhädiuñän. Cabä Dios mäniä yajtägøøyy tuubä. Jia hahijx jecy pø mæbøgáañäxäbä miädia'agy hänajty. Coo jaduñ yhijxy coo hajxy hänajty nämay quia'a mæbøga'añ, mänitäs yajtägøøñä tuubä. Mäniä nøøgomdägoy tiägøøñä. Jagooyä Dios yhijxy coo Noéhajxyhajiä hänajty miäbøga'añ, ja'a hajxy hänajty näductújjiäbä. Jagooyä Noéhajxy jaduñ miäbøjcy. Je'eds hajxy jaduñ jii by tsooc barcojooty, ja'a hajxy hänajty tøø yhädiúñäbä. ²¹ Nebiä Noéhajxy jecy chooquiän jii by barcojooty mänaabä nøøgomdägoy jaduñ tiägø'øyän, jaduñ mäwínäts je'e miäbaady néjjiäm coo hajxy nnäbéjtäm nøøjooty, coo Jesucristo hajxy xyajnähwáatsäm mänaa jiuypiojtägachän. Paady hajxy jaduñ nnäbéjtäm nøøjooty, hijxtahnd jaduñ coo hajxy nnähwáatsäm. Ja'a ngorazonghajxy jaduñ wáatsäm, ca'a ja'a ni'xä ngopc-hájtäm. Coo hajxy jaduñ nnäbéjtäm, jaduñä Dios hajxy hamuumdu'joot nhawáañäm coo Jesucristo miädia'agy hajxy nnä'ägädä panøcxáañäm. ²² Coo Jesucristo hänajty tøø jiuypiojtägach, mäniä jim ñøcxy tsajpootyp. Jim yhäñaañä maa Dios quiø'ø hahooyhaampiän. Je'e jaduñ ñänøømby coo cuhdujt jim miøødä møj jaanch. Hix,

wiingudsähgøøyyäbä Jesucristo jim. Ja'a Dios mioonsähajxy, ja'a hajxy jim hijpä tsajpootyp, je'eds hajxy jaduñ mäwiingudsähgøøby, møødä cuhdujtmøødpähajxy. Høxtä møjcu'ubaadyhajxy yhane'emyii ja'a Jesucristäm.

4

¹ Coo Jesucristo chaačhpøjcy, miee'xtujc ja'a tsaachpä jaduñ. Jaanä jaduñ mijtspä, coo Jesucristo hajxy mmøødhity tu'ugmädia'agy, paady hajxy jaduñ mmee'xtújpät, coo hajxy hänajty pøn xyajtsaachpøcy. Coo hajxy jaduñ mjaanč tsaachpøjpät nebiä Jesucristo chaačhpøjquiän, jaduñ hajxy myajcähxø'øgät coo mhaxøøgwiiinmahñdy hajxy tøø mhøxhijxnä. ² Coo mhaxøøgwiiinmahñdy hajxy jaduñ mjaanč høxhixät, hoy hajxy jaduñ mjäya'ayhada'añ mäduhñtiä hajxy yaa mjaac hida'añ hädaa yaabä naaxwiin. Jaduñä Dios hajxy xquiumáyät. ³ Jue'e mijts hijty, haxøøg hajxy hijty mjatcø'øy nebiä häna'c-hajxy jiatcø'øyän, ja'a Diosmädia'agy hajxy ca'a mæbøjpä. Cab jaduñ yhahixø'øy coo hajxy jaduñ mjatcøøñät. Hanaxiä hajxy hijty haxøøg mjatcø'øy. Hanaxiä jocnøø hajxy hijty mjaanč tehñ yhu'ugy mjaanč tehñ jiøø'xy coo xøødsuu hijty maa jiadyii. Tsähdiuhndägoy hajxy hijty mjatcø'øy, ya'adiøjc møødä to'oxiøjc. Jäya'ayhadsejtsnaxy hajxy hijty naxy mwiingudsähgøøby møødä jäya'ayhabojtsnaxy. ⁴ Y ja'a jäya'ayä Diosmädia'agy hajxy ca'a mæbøjpä, ja'a mijts hijty naxy mmägu'ughajpiä, yagjuøøby hajxy jaduñ coo mijtsä mhaxøøgwiiinmahñdy mga'a yaghanajxnä

neby hajxy hijty myaghanaxiän. Paadiä mmägu'ughajpä hajxy jäda'ahaty xñähojnä. ⁵ Pero coo Dios jaduñ yajnähdijat coo hänajty tøø yhabaatnä, mänit hajxy hänajty tiøyhajtyega'añ maa Dioswiinduumän. Mänitä hajxy yajcumädowa'añii ja'a Diósäm, hoy hajxy hänajty jia jujyquiä, hoy hajxy hänajty tøø jia ho'ogy. ⁶ Hix, jaduñä Dios jioot chocy coo ho'ogyjiäya'ayä miädia'agy hajxy ween miäbójcäxä, paadiä Dios ja'a yHuung Jesucristo jim quiejxy maa ho'ogyjiäya'ayhajxy hänajty tsumy yhitiän. Jimä Jesucristo ja'a Diosmädia'agy hoy yajnähixø'øy coogä Jesucristo miäyajnähwa'açh. Jadúhñägä ho'ogyjiäya'ayä jiäwøhñdyhajxy homiänaajä jiugyhädät nebiä Dios jiugyhatiän, hoyyä ñi'xä quiopc-hajxy hänajty tøø jia ho'ogy.

⁷ Habáatnäp jaduñ coo naaxwiimbä wyiimbidaañnä. Paady hajxy tehngajnä mniyajcopcø'øwøjät nebiä mjoot hajxy yaa mga'a pädá'agät maa hädaa yaabä naaxwiimbän. Jaduhñä Dios hajxy hoy mba'yá'axät hamuumdu'joot. ⁸ Je'e jaduñ nä'ägä tsoobaatp coo hajxy hamiñ haxøpy mniçhoc mnimiee'xøjät. Hix, coo hajxy hamiñ haxøpy nniçhójcämät, mänit hajxy hoy nnimiämée'xämät. Jaduhñ hajxy hoy ndsänäyyämät. ⁹ Coo pøn jim quiuyo'oy quiunaxó'øwät maa mjøøn maa ndøjc-hajxiän, hamuumdu'joot hajxy myajtøjtägø'øwät. Myajcay myaghú'ugäp hajxy jaduñ hahoy haween. ¹⁰ Cøjwiinduumä Dios wiinmahñdy hajxy xmióoyyäm coo tuuñg hajxy

wiingjaty nmøødhájtäm. Jaduhñä jäya'ayhajxy nägøxiä piuhbedøøjtät, ja'a hajxy hñajty tøø miäbøquiäbä ja'a Jesucristocøxpä. Jaduhñ hajxy mnibihbedøøjtät nebiatiä Dios tuuñg hajxy cøjwiinduun tøø xmio'oyän. ¹¹ Pønjaty tøø tiuunngmo'oyii coo Diosmädia'agy hajxy yajwá'xät, hoy hajxy quiapx miädiá'agät nebiä Dios quiapxy miädia'aguiän. Pønjaty tøø tiuunngmo'oyii coo hajxy miäbuhbédät, ween hajxy jaduñ hamuumdu'joot miäbuhbety. Ja'a Dios jaduñ puhbédäp. Coö hajxy hñajty tijaty mduna'añ, hoy hajxy mdúnät; jaduñä jäya'ayhajxy miäbøgät coo Dios miøjjä jiaančhä. Wyiingudsähgø'øwaambiä Dios hajxy jaduñ je'eguiøxpä coo Jesucristo hajxy hoy xyajñähwáatsäm. Cøjxta'axiøø ja'a Dios wyiingudsähgø'øwa'añii. Cøjxta'axiøø møjcuhdujt miøødhada'añ. Amén.

¹² Mägu'ughajpädøjc, cab hajxy myagjuó'øwät coo tsaächpä hajxy naxy xpiaady møc-haampiä. Hix, tsipcøxpä tsaächpä hajxy xñä'ägä paada'añ. ¹³ Jaduhñ quiähxó'øgät pø hamuumdu'jootä Diosmädia'agy hajxy mjaančh mábøcy ja'a Jesucristocøxpä, pø caj. Hix, maas hanaxiä Jesucristo chaačhpøjcy mänaa hajxy hoy xñähho'túutäm. Hix, coo Jesucristo hajxy jaduñ mmøødhity tu'ugmädia'agy, paady hajxy jaduñ tsipcøxp mbadsaačhpøjpät. Ý coo Jesucristo hñajty yaa quiädaactägatsa'añ hädaa yaabä naaxwiin, mänit hajxy hñajty mjaančh tehñ xioonda'aga'añ. Paady hajxy jäda'ahaty mxoondaácnät, hoyyä tsaächpä hajxy jaduñ xjia paady. Pero cabä tsaächpä hajxy jaduñ myagjuó'øwät. ¹⁴ Coö hajxy

põn xñähójät ja'a Jesucristocøxpä, cab hajxy myagjuó'owät. Pero mxoondá'agäp hajxy jaduñ. Hix, jaduñä Dios ja'a yhEspírituhaam hajxy xpiuhbédät mөөдä wyiinmahñdyhaam. Coos mijsä jäya'ay xyhíxät coo hajxy mmee'xtucy coo hajxy hánajty mdsaačhpøcy, mánitä Dios hajxy wyiingudsähgø'owa'añ. ¹⁵ Hahixøøby jaduñ coo hajxy mdsaačhpøgät, pø tøø hajxy hánajty mmäjäya'ay-yagho'ogy, pø tøø hajxy hánajty mmämeeč, pø tøø hajxy hánajty myajtägø'øy maa cueendä hajxy hánajty mga'a mөөдän. Cab jaduñ yhooyä coo hajxy jaduñ mjatcø'owät. ¹⁶ Pero je'e mábøcypiä caj chähdiuhñdmөөдä coo hajxy mdsaačhpøgät je'eguiøxpä coo Jesucristo hajxy hánajty mwiingudsähgø'øy. Jootcuic hajxy jaduñ mhídät. Mnämä'awäbä Dios hajxy "Dioscujú'uyäp" ja'a Jesucristocøxpä.

¹⁷ Tøø yhabaatnä coo Dios hajxy xyajtøyhajtyegáañäm. Coos Diosmädia'agy hajxy nmäbøjcäm, paady hajxy jayøjp xyajtøyhajtyegáañäm, paady hajxy jayøjp xyajtsaačhpøjcäm. Pero ja'a häna'cä Diosmädia'agy hajxy ca'a mábøjpä, coo hajxy hánajty tiøyhajtyega'añ, maas hanaxiä hajxy hánajty chaačhpøga'añ. ¹⁸ Siémprämä hojiäya'ayhajxy chaačhpøga'añ. Maas hanaxiä ca'awiindøyhäna'c-hajxy chaačhpøga'añ, ja'a Dios hajxy ca'a wiingudsähgøøbiä. ¹⁹ Coos hajxy hánajty pøn xyajtsaačhpøcy nä'ä nägoobä, cab hajxy mmøjpädá'agät. Tehngajnä hajxy hoy mjaac jäya'ayhádät. Hix, ja'a Dios hajxy hánajty tøø xyajmädsocy coo hajxy mdsaačhpøgät.

5

1 Mijts majjäya'adiøjc-hajxy, ja'a hajxy jim tuumbä tsajtøgooty, mijts cham nmägapx nhane'emaamby. Nmøødhøchä cuhdujt jaduñ cooch mijts jaduñ nmägapx nhané'emät, je'eguiøxpä cooch tøø nmäjaabä, møød cooch jim nduumbä tsajtøgooty. Nhijxhó'c-høchä Jesucristo jim cruzcøxp. Y coo Jesucristo yaa quiädaactägätsät hädaa yaabä naaxwiin, näguipxy hajxy hänajty jim xyajnøcxäänäm tsajpootyp, høøch møød mijts. Jimä hoyhajtä weenhajt hajxy xmio'owäänäm pedyii. 2 Mijts majjäya'adiøjc, hoyyä Diosmädia'agy hajxy myajnähiø'øwät hamuumdu'joot, ca'a yhadsip ca'a yhajootma'adä. Hamuumdu'jootä cu'ug hajxy mmägapx mhané'emät. Hix, ja'a Dios hajxy tøø xpiäda'agy coo cu'ug hajxy jaduñ myajnähiø'øwät, møød coo hajxy mmägapx mhané'emät. Cab hajxy xädø'øñguiøxpä myajnähiø'øwät. 3 Cab hajxy møc møc mhané'emät. Mee'xxieemy hajxy myajnähiø'øwät. Hoyyä Diosmädia'agy hajxy myajtúnät; jaduñä cu'ug hajxy xpiahix xpiadúnät. 4 Y coo Jesucristo yaa quiädaactägätsät, ja'a hajxy nWiindsønhtëmbä, mänit hajxy xquiumaya'añ pø tøø hajxy hänajty hoy myajnähiø'øy. Mänit hajxy hänajty jim xyajnøcxa'añ tsajpootyp. Cøjxta'axiøø hajxy hänajty jim mhida'añ.

5 Møød mijts muutsc-häna'c, jaduñ mijtspä, mwiingudsähgø'øwäbä majjäya'ay hajxy. Coo hajxy waamb xmiägapx xyhané'emät, mgudiúnäp hajxy jaduñ. Hahoy haween

hajxy mnibihbedóøjät hamiñ haxøpy, hoy miøjjä hoy miuutschä. Hix, coo hajxy jootmøj mnibiäda'agóøjät, xyajcumädówäbä Dios hajxy jaduhñ. Pønjaty capxp mädiaacp mee'xxieemy, je'edsä Dios piuhbejpy. Móoyyäbä hoyhajtä weenhajt hajxy jaduhñ. ⁶ Coo Dios hajxy jaduhñ mänaa xyajtsaächpógät, cab hajxy mmøjpädá'agät. Jim hajxy mnibiäda'agóøjät maa Dios quiø'øba'c tiecypia'cän. Møcmäjaa Dios jiaančh tehñ miøød. Hix, cujequiä Dios ja'a tsaächpä hajxy xyajnähwá'adsät. Mänit hajxy jootcuyc xjiaančh tehñ yaghida'añ. ⁷ Coo hajxy hänäjty tii mnädajy mnämay, mmänuu'xtá'agäbä Dios hajxy jaduhñ coo hajxy ween xyaghoyøøyyä. Hix, homiänaajä Dios hajxy xcwieendähaty.

⁸ Mniyajcopcø'øwóøjöp hajxy; jaduhnä Jesucristo miädia'agy hajxy hoy mbanócxät tehñgajnä. Jaduhnä møjcu'ugongä wyiinmahñdy quia'a mäjädá'agät. Hix, ja'a møjcu'ugong, homiänaajä hajxy jaduhñ xmiädsiphájtäm. Xjia wi'i yajtu'udägoyyáañäm hajxy jaduhñ. ⁹ Cabä møjcu'ugongä miädia'agy hajxy mmäbójcät. Hamuumdu'jootä Diosmädia'agy hajxy myajtúnät tehñgajnä. Hix, pønjatiä Diosmädia'agy mäbøjp wiinduhmyhagajpt, jaduhñ hajxy chaächpøjpä nej mijts mdsaačhpøquiän. ¹⁰ Cab hajxy jejcy mdsaačhpøga'añ. Coo Dios ja'a tsaächpä hajxy hänäjty tøø xyajnähwa'ačh, mänitä Dios hajxy hamuumdu'joot xyajmäbøgaannä ja'a Jesucristo miädia'agy. Ca'xy pedyii Dios ja'a wyiinmahñdy hajxy xyajnähixø'øwa'añ. Ja'a Diósäts hajxy jaduhñ xcwieendähájtäm, hoy hajxy nej cu nja

jajt cu nja habéjtäm. Tiuumbiä Dios mayhajt jaduhñ maa højtscøxphájtäm. Jaaya'ay hajxy jaduhñ tøø xyajnáhdíjjäm coo Jesucristo hajxy jim xyajnøcxáanäm tsajpootyp. Cøjxta'axiøø hajxy jim nhidáanäm. Hix, cøxiä Dios ja'a hoyhajtä weenhajt hajxy jaduhñ xmióoyyäm. ¹¹ Cøjxta'axiøø ja'a Dios hajxy tsøc wiingudsähgøøyyäm. Cøjxta'axiøø ja'a Dios møjcuhdujt miøødhada'añ. Tøyhajt jaduhñ.

¹² Ja'a mägu'ughajpä Silvano hädaa nocy jahby. Høøch nnajtscapxøøyyäp. Cab hädaa nocy jiaty yoñä. Hoyyä Silvano Diosmädia'agy jiaançh tehñ yajtuñ. Tøyhájtthøch cham tøø ngapxy tøø nmädia'agy nebiä Dios tøyhajt wyiinmayyän. Tøø Dios møjmayhajt tiuñ maa højtscøxphájtäm. Tøø hajxy jaduhñ xyajmädsójcäm coo hajxy jim xmiøødhíjtämät tsajpootyp.

¹³ Ja'a jäya'ayhajxy yaa tsänaabiä Babilonia, ja'a Diosmädia'agy hajxy mäbøjpä ja'a Jesucristocøxpä, xyajpoo'xp mijts jaduhñ. Nej mijtsä Dios xyajnáhdíjjän coo miädia'agy hajxy mmäbøjcät, jaanä jaduhñä jäya'ayhajxy yaabä yajnáhdíjjäbä coo hajxy miäbøjpät. Jaduhñ mijtsä mmägu'ughajpä Marcos xyajpoo'xpä. Nébiøchä nhamdsoo húungänä Marcos njuø'øy. ¹⁴ Coø hajxy hänäjty mhamugø'øy Dioswiingudsähgøøbiä, hamiñ haxøpy hajxy mniyajpoo'xøøjät. Jaduhñ hajxy myajcähxø'øgät coo hajxy tøyhajt mniçhocy mnibia'häyoyii hamuumdu'joot.

Pønjetiä Diosmädia'agy panøcxp ja'a Jesucristocøxpä, weenä hoyhajtä weenhajt hajxy mio'oyii ja'a Diósäm. Amén.

El Nuevo Testamento en mixe de Guichicovi New Testament in Mixe, Isthmus (MX:mir:Mixe, Isthmus)

copyright © 1988 Wycliffe Bible Translators, Inc.

Language: Mixe, Isthmus

Translation by: Wycliffe Bible Translators, Inc.

Mixe, Guichicovi [mir], Mexico

Copyright Information

© 1988, Wycliffe Bible Translators, Inc.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Mixe, Isthmus

© 1988, Wycliffe Bible Translators, Inc.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

PDF generated using Haiola and XeLaTeX on 21 Feb 2024 from source files
dated 29 Jan 2022

4e564219-157f-5807-b810-47a15308b8b8